

四庫全書

集部

欽定四庫全書

石倉歷代詩選卷三百十一

明 曹學佺 編

明詩初集三十一

藍智

擬貧士二首

蠨蛸網我戶蟋蟀號我壁被褐不掩脰采薇豈充食歲  
有饑寒憂巷無車馬跡豈知曠達觀不以貧病迫昔聞

孔顏聖亦有陳蔡厄澹然忘世慮弦歌自朝夕

蓬門有一士被褐恒苦饑朝飲南澗流暮食西山芝雖  
有二頃園蕪穢亦不治妻子共寂寞彈琴詠書詩荒林  
積雪深古屋炊烟遲高卧自有適何必他人知

客建上將歸山中留別鎰典籤

入山願遠遊出山願早歸羈懷苦無悰芳序倏已非  
瀾江海流紛紛花絮飛清霜變玄髮游塵化緇衣  
驚危迹易乖少壯心轉違雲鴻每獨往梁燕當疇依  
野樹滯

殘雨荒臺澹斜暉浩歌綠水曲空拂黃金微

宿田家望武夷山

仙崖蓄靈異  
惟石盤空曲  
一水隔花村  
千峯入茆屋  
金芝暖逾秀  
瑤草寒更綠  
雲中武夷仙  
一一顏如玉  
白馬去不歸  
玄猿叫相逐  
昔陪丹丘侶  
酣歌紫霞谷  
雞鳴洞天曉  
落月在林木  
空瞻仙子高  
舊夢那可續  
荒林激悲風  
日入對樵牧  
佇立望歸雲  
解衣田舍宿

暮宿田家作

木落天正寒、山空日將暮、荒林倦鳥歸、亂水行人渡、窮  
年滯草莽、短褐被霜露、晚宿依田家、主人情亦故、汲水  
泉滿澗、燒竹烟在戶、鐘殘溪上村、月照階前樹、濁酒初  
潑醅、嘉蔬亦時具、且慰饑渴懷、況諸村野趣、老翁八十  
餘、有子歿、征戍杭稻歲、莫收官司日、加賦我願息兵戈  
海宇重農務、愧乏經濟才、徒然守章句

正月十四日西山感興

久曠山水遊、今晨願無違、松林收殘雨、郊園澹朝暉、慙

澗弄清泚緣岡陟翠微池魚暖始遊岩花寒尚稀高人  
坐空堂深竹對掩扉山中聞犬吠谷口見樵歸心賞適  
有契仙遊詎能希賴此一樽酒暫然息塵機古來朝市  
間榮華多是非所以首陽士白首甘采薇

風雨不已川流渺漫感事敘懷柬我同志

雲雷中夜興風雨達清旦開門山木昏隱几波瀾亂鶴  
鶴下空庭蛟螭上高岸舟航遠樹杪石壁中流半黍豆  
或漂流蓬蒿乃滋蔓北風不掃除南海盡瀰漫廼知兵

戈氣鬱結久不散坤軸恐歌傾陽烏失光燦傷時轉淒涼涉世正憂患微躬愧鳥雀何由塞天漢

暮秋懷鄭居貞

季秋霜露降草木日已衰暮登城門丘遙望滄海涯鳥鳴求其羣況在遠別離美人顏如玉夢寐恒見之飄蕭紫鳳毛照耀珊瑚枝海水不可越丹砂詎能期灑灑杯中酒泠泠桐上絲豈無一日歡念子平何時少壯難合并流光倏如馳悠悠逝川歎渺渺停雲思

廬山

峩峩匡廬山渺渺江湖區  
下蘊龍虎氣上通仙靈都  
微雲出巨壑飛雨徧海隅  
崖瀑瀉銀河隨風散明珠  
五老何翩翩蒼然古眉鬚  
徘徊芝山翁彷彿桃源徒  
芙蓉落日淨白鶴秋風孤  
靈境不可即維舟增鬱紆

湘江晚泊柬孟原僉憲

山秋衡霍空江晚瀟湘淨  
烟景澹蒼屏芙蓉肅明鏡  
澄波木葉下落日餘霞暎  
仰聆幽鳥喧俯覩文鱗泳  
碧石



拐輕舟蒼苔踏微徑林昏出樵火寺遠來僧磬景晏傷  
旅懷地幽慊愚性跡慚箕穎高身際唐虞聖三秋持使  
節萬里奉王命恩沾雨露深志伏風霜勁敢辭道路遙  
况接才華盛靜夜發商歌劍光南斗並

泛湘江

逶迤湘水長浩蕩蘭舟遠野曠衡岳秋天空洞庭晚芙  
蓉覆清波荔薜搖翠巘逕轉松林深崖傾菊花滿依稀  
辨村落重疊見丘阪蒼蒼林日微悄悄墟烟斷寒魚已

入夜棲鳥亦知返旅泊愧倥傯塵襟藉踈散山林未如  
願泉石空在眼掛帆望南斗中夜哀歌短

書懷寄示小兒澤

昔我南澗來遂謀西園居瀟瀟桑柘陰下有比屋廬交  
枝囀黃鳥澄波躍文魚花香入戶牖草色連階除衡門  
閉白日高詠古人書目送遠山雲心游天地初貧賤固  
可樂富貴將焉如

河池縣險路

連峰入河池險路徭人村喬木盡參天白日為之昏上  
有高石崖下有清水源蕭蕭篁竹叢落日聞哀猿職當  
觀民風載驅隰與原瘦馬嘶不動瘠童行似奔山川秋  
氣高鷹隼宜飛霧俯念遠人思仰慚父母恩東郊有茆  
屋時稼繞衙門攬轡倦行役徘徊思故園

秋山懷友

天寒草木踈落日照平野孤雲西北馳獨鳥東南下仰  
聆寒蟬悲俯見驚鴻瀉物情自索莫秋色正瀟灑良朋

久相違離思何由寫

為陳叔原題漁樵圖

武夷老人年七十畫業漁樵夜妻織有兒長大不讀書  
採山釣瀨供衣食此翁自是神仙徒牀頭酒香不用沽  
生逢太平少征歛雖有生產無官祖昨朝自携書一束  
過我衡門看秋菊新圖蒼莽烟水寒復有疎篁間枯木  
一客負薪山路長一客傍舟魚在梁荒林無人日未落  
偶坐有意俱相忘知君老去猶愛此能以安閒遺孫子

愧我十年塵土間按圖欲借溪南山

秋堂圖為陳原謙賦

故人家住臨川曲獨向秋山結茆屋太平海宇尚文治  
白日弦歌在空谷賈生亦有政事書杜陵何必成都居  
直從五雲叫閭闔豈顧萬里勞舟車東南烽火連城郭  
迴首松雲隔丘壑曳裾久食諸侯門仗劍暫入將軍幙  
將軍一戰復城池五馬仍持太守麾掉舌已能平亂境  
苦心端為撫瘡痍黃花紅葉公庭靜夜涼却憶秋堂興

山童掃葉月侵階  
野老閉門雲滿  
逕晴窗示我方壺圖  
匡廬彭蠡秋風初  
故鄉未報洗兵馬  
扁舟何處尋鱸魚  
我家卜築西窗下  
兄弟連牀書滿架  
石田春暖薺薇香  
竹屋燈寒風雨夜  
自從淮海戰塵昏  
官府誅求政令煩  
無人問字日携酒  
有吏催租夜打門  
山林雖好難容跡  
明年擬作江東客  
直道何須光範書  
匡時空負劉蕡策  
人生須作遠大期  
丈夫豈惟鄉里思  
求田問舍徒為耳  
富貴功名良有時

雨中東王幼度

客子清晨卧江閣老樹閉門風雨惡漁舟滿眼亂波濤  
殺氣冥冥塞寥廓地爐火冷席無氈短衣百結雙履穿  
寒食清明不歸去故山松栢空雲烟先生適自江東至  
行李兼旬共留滯登樓王粲謾多才獻策劉資甘下第  
三鱸聊爾擁羣比一鷄未負風雲期青春白日麟鳳遠  
長林豐草豺狼饑十年烽火暗南極戎馬紛紛未休息  
朝廷耆舊困草萊鄉里兒童誇膂力我今旅食向孤城

君亦胡為念遠行人生只在意氣合世亂未覺文章輕  
野人豈知天下事杜宇夜啼花滿地狂如賈誼惟痛哭  
貧似楊雄空識字昨夜封書與雁歸妻孥應怪苦遲回  
丈夫磊落志千載一日窮途何足悲

題鄭德彰員外所藏高彥敬畫楚江春曉圖

旭日未出羣山昏蒼茫楚江多白雲芳洲無人採蘅杜  
落花飛絮春紛紛晴嵐滿戶漁家曉花枝髣髴聞啼鳥  
巫陽夢斷三峽空相渚愁深九疑小文采風流高尚書



如此江山歸畫圖平湖烟靄水空濶陰壑松檜天模糊  
左司郎官何處得高堂紫翠生春色是中宜有五湖人  
一葉扁舟蕩空碧風塵兵草浩茫茫對此便欲歌滄浪  
碧梧翠竹生高岡豈無彩鳳鳴朝陽

送閩憲史丘子脩回三山

我昔南遊訪蓬島越王城郭生芳草釣龍臺下晚潮空  
道山亭上秋風早朱樓綺戶歌太平邊塵不驚河水清  
祇將六籍論經濟何用萬里求功名豈信流光不相待

風景未殊人事改羞將藥裹對青山獨向雲林望滄海  
浮丘之子黃鶴姿羽人曾作滄洲期醉持瑤草渡弱水  
笑接白雲來武夷昨朝別我三山去却憶當年舊遊處  
世事悠悠西浦波愁心歷歷洪塘樹人生行樂在青春  
出門四顧多烟塵少年裘馬誇意氣自古文章難致身  
山川蕭瑟年華晚李子貂裘霜雪滿扁舟何處夢相思  
月落江空雁聲遠

春夜宴伯穎元帥宅題雲林茆屋圖

高堂華燭延賓客，疊嶂層崖寫秋色。  
五老天寒楚樹青，九疑日暮湘雲白。  
茆屋溪頭何處村，長林無人啼鳥聞。  
嵐侵山市畫冉冉，葉墜霜野晴紛紛。  
清夜高城雷雨作，將軍置酒相娛樂。  
月黑蛟龍起洞潭，山荒虎豹依叢薄。  
少年愛畫頗入神，時危思與烟霞親。  
故園不歸湖上宅，春樹長憶江東人。

題璋上人所藏溫日觀墨蒲萄

鮫人織綃翡翠宮，驪珠滴露垂玲瓏。  
老禪定起寫秋影，

空山月轉雙梧相憶昔初移大宛種苜蓿榴花俱入貢  
蓬萊別館綠雲深太液晴波水晶重貝南之谷曇老居  
生紙顛倒長藤枯墨池禿盡白兔頽天風吹墜青龍鬚  
祇園馬乳秋初熟點綴鸞湖雲一幅醉草猶疑懷素狂  
寒梅頽覺華光俗野堂十尺手所栽兵戈無沒同蒿萊  
日斜對畫獨回首詩成誰致西涼酒

雲峯秋霽圖為方煥賦

茆屋溪頭紅葉村石梁秋水清無痕粉榆過雨鳥鳴澗

杭稻如雲山對門老翁日高睡未起  
穉子讀書窗戶裏  
千戈如此賦歛煩雞犬晏然鄉曲喜  
山中酒熟黃花開  
仙人候我芙蓉臺  
雲林今夜好明月  
擬跨幔亭黃鶴來

贈武夷魏士達

武夷山水天下無  
層巒疊嶂皆畫圖  
山川直疑混沌鑿  
秦漢而下靈仙都  
中天積翠開宮殿  
石壁虹光夜如電  
鸞鳳常驂神姥遊  
猿猴共醉曾孫宴  
洞中別有昇真天  
瓊林遺蛻如枯蟬  
露盤仙掌千年藥  
春水桃花九曲船

萬松岡頭羽衣客更入三山采真訣神游不計海天遙  
夢覺長懷海天白歸來高隱萬年宮天香時降雙青童  
道叅元始鴻濛外身寄虛空象緯中嗟予久慕烟霞侶  
天遣空山作詩苦清歌曾遶幔亭雲凍筆空題草堂雨  
金丹擬就玉蟾分木葉西風鐵笛聞野老只知堯舜世  
樵夫或遇武夷君

送鄭彥斌歸新安

越王城頭花似霰越王城下江如練倦客三春正憶歸

美人千里初相見  
羨君之才不作官  
知君有酒常開顏  
朝陽鳴鳳在中野  
白雲黃鶴懷青山  
王門曳裾今幾載  
賓主風流擅文采  
竹書燈火卧西窗  
玉帳旌旗鎮南海  
南海魚肥荔子香  
君獨胡為念舊鄉  
秋風落葉茆茨晚  
春草啼鴉丘壘荒  
新安山水東南美  
洙泗淵源有朱子  
莫將三絕動君王  
但用六經訓閭里  
伯也看山入武夷  
清泉白石共題詩  
約君明日扁舟發  
爛醉幔亭溪上月  
相逢行贈徐剛中之建寧兼東黃彥美總帥

去年逢君紫霞洲今日逢君滄海頭逢君處處好顏色  
歎我年年長作客被褐昂藏七尺軀蟠胸磊落五車書  
姑蘇臺北曾走馬越王城南還釣魚看花夢想揚州遠  
採藥歸來杏林晚堂上慈親鶴髮長階前兒女鷄衣短  
見君雖貧不解愁結交盡是豪俠流侯門咫尺耻干謁  
客路尋常歌遠遊我亦扁舟滯江浦握手相看總羈旅  
千年龍劍蝕塵泥三月鶯花老風雨明日洪塘又送君  
離亭詩思正紛紛黃鱸有酒莫漫醉待予同擬梅仙雲



攬秀樓詩為九江陳仲文作

將軍樓成九江口背倚長江面廬阜雙劍寒光列畫圖  
香爐曉色當窗牖一官作鎮已三年雞犬不驚人晏眠  
案上芸香浮竹簡檻前帆影過江船我來正值西風落  
南望雲松秋萬壑五老應乘白鶴來諸公不負黃花酌  
庾亮樓前空薜蘿虎溪明月漾晴波一時人物風流盛  
千古江山感慨多絕壁孤烟淨如掃雲錦芙蓉鏡中老  
攬秀長歌太白詩木落江空雁聲小

赤壁

長江西來雨如霧赤壁蒼蒼風雨暮草木猶疑橫槩時  
塵沙尚憶焚舟處烏林渡口下舳艫曹瞞已料無全吳  
陣前部曲奔先主眼中談笑輕周瑜君臣謀合士賈勇  
王帳旌旗亦飛動樓櫓晴空烟焰高魚龍白日波濤湧  
荊門牢落駐殘兵野曠不聞鼙鼓聲戰骨秋埋湖外草  
捷書夜報石頭城雄圖霸氣兩消歇地老天荒秋一葉  
石上殘碑過客題沙中古劍漁人得漢王祠枕碧山隅

諸葛臺荒野鳥呼千年忠義出師表萬里江山八陣圖

泛洞庭湖作

昔歌杜甫洞庭作壯思高秋動寥廓天風吹夢岳陽樓  
九月揚帆湖水落中流四望破泠泠遙天倒浸涵滄溟  
龍堆千尺雲濤白鼇背一點君山青茫茫元氣浩無外  
巨澤方知百川會錦浪愁翻灩澦深黃流怒擘崑山碎  
漂吳蕩楚注海門吞雲吸夢移山根東南但見日月出  
咫尺常愁雲雨昏輕舟破浪疾如箭瓣香走謁龍王殿

琴高赤鯉有時逢  
溫嶠燃犀那可辯  
偶然風靜波不喧  
青銅一鏡磨蒼雲  
舟人漁子雙雙過  
斷雁殘鴉箇箇聞  
汨羅欲弔懷沙客  
芳洲誰鼓湘靈瑟  
清淚空餘野竹斑  
忠魂何許楓林黑  
古今萬事共悠悠  
人生有酒且澆愁  
喜探禹蹟得奇觀  
濯足滄浪歌遠遊

秋曉南薰亭望隔江羣峰初日宛然如畫

扶桑西南丹桂林  
初日照耀羣峰青  
琅玕墜露天杳杳  
芙蓉隔水秋冥冥  
我騎瘦馬踏殘雨  
乘涼燕坐南薰亭

是時燭龍吐光晶倒影正掛雙玉屏祥烟慶雲忽飛動  
翠旂羽蓋搏紫清恍如仙人下雲輶金銀宮闕羅蓬瀛  
丹青疑對李郭畫詭怪莫過山海經江波蕩漾洲渚橫  
時有鳥雀啁啾鳴西郊爽氣生檐楹毛髮颯颯通神靈  
重華一去呼不返疑山九點浮青萍黃帝垂衣靜西溟  
杲杲白日中天行湘江之竹鸞鳳聲吹作簫韶詠太平

銅雀臺效劉彥炳賦

曹瞞騁志吞劉社銅雀臺高瞰中夏徒知扼腕有卧龍

豈料垂涎已司馬萬里河山尚出師九原魂魄歸何時  
清秋風雨滿陵樹落日笙歌繞總帷翠娥紅袖恩情絕  
廢冢荒臺孤鬼穴空餘片瓦落人間千載奸雄磨未滅

送春詞

把酒送春春欲歸落花無言愁不飛天涯萬里不忍別  
杜宇啼乾枝上血離亭芳草色萋萋不為東君絆馬蹄  
傷心燕子銜將去綠陰細雨簾攏暮小園桃李明年開  
土牛迎春春早來但願花枝長好人長健歲歲年年一

相見

落花怨

春風開花花滿枝  
春雨落花花作泥  
飄紅墜白不解惜  
裁青剪翠空如迷  
莫嫌花飛春去早  
第恐春歸人易老  
狂蝶無心戀故枝  
遊蜂有意穿芳草  
江上行人去不歸  
閨中少婦淚沾衣  
春愁縈人無遠近  
燕子不來花落盡

天涯路

十年一片土云是天涯路  
路上行人西復東  
惟有青楓

記朝暮楓樹推為薪行人朝暮新脩途傷馬足峻阪折  
車輪前車已折馬已死後來行行殊未已君不見阮籍  
窮途哭杜陵悲路難夸父逐日骨已朽穆王八駿何時  
還年年江水流日日黃塵飛天涯路君不歸草根夕露  
沾人衣

宿橘山田家懷蔣先生

蒼峰落日微白鶴秋風遠客路入踈鐘田家背山阪孤  
烟桑柘寒歸鳥茆茨晚欲覓紫芝翁山深白雲滿



曉起

雞鳴庭樹寒白露滿秋草候蟲悲夜長愁人起常早出  
門衣常單悵望千里道歸來守衡茆藜藿猶可飽

西山暮歸

涼葉墜微風秋山正蕭爽天寒獨鳥歸日夕百蟲響偶  
從桂樹招遂有桃源想石磴閒無人山猿自來往

暮歸山中

暮歸山已昏濯足月在澗衡門棲鵲定暗樹流螢亂妻

欸候我至明燈共蔬飯佇立松桂涼疎星隔河漢

郊居

郊居頗岑寂疎懶諧愚性雨過茆屋涼蟬鳴晚山靜坐  
來塵慮空始覺心源瑩月出樵牧還松風谷清磬

九日病中

伏枕山林遠閉門風雨深一秋貧轉甚九日病兼侵落  
葉荒三逕窮愁折寸心細看黃菊藥空感白頭吟

徐雪舟為畫藍澗草堂圖

碧草連書屋蒼山對畫圖  
鶴巢秋樹小漁艇夕陽孤  
野色晴初遠溪雲淡欲無  
浮楂倚盤石把釣任潛夫

經石堂追懷盧使君

舊隱仙人館曾陪使者車  
那知滄海別不返白雲居  
山雨荒樵徑窗塵汙道書  
傷心庭外竹清影漫扶疎

兵後歸西山

亂後歸茆屋晨興步石田  
客愁空日日春色自年年  
風雨啼鶯外江湖去鳥前  
艱難思故舊回首意茫然

復歸西山作

旅寓初回棹幽棲暫閉關  
桑麻林下宅樵牧雨中山  
小徑看花入孤雲共鳥還  
時清甘屏迹黃綺自商顏

秋雨

秋雨林逾潤川雲晚更停  
遠峯明白塔古木暗蒼屏  
野老營茆棟山僧寄茯苓  
千將塵土蝕猶有氣冲星

晚步

伏熱草木焦微涼竹林晚  
天清一鶴高波靜羣鷗遠  
散

策不知疲臨流亦忘迈月出林影昏疎鐘閉山館

秋夕懷雲松先生

夜永倦孤眠竹涼宜小立荒林獨鶴棲破屋疎螢入萬壑共秋聲四山惟月色清賞恨不同晤言念茲夕

藍澗草堂

橘井雲山北茆齋澗水西聽猿秋樹近捫虱夕陽低樵子知愚谷田翁伴醉泥興來時得句自向竹間題

聞藍山兄寓滁州

番水初傳信  
滁山想定居  
秋吟兼蟋蟀  
晚飯得鱸魚  
落月滄江濶  
涼風白髮疎  
兵戈關塞隔  
不敢問何如

登鳳林寺鐘樓作

樓憑青嶂迥  
人到上方稀  
古寺愁春雨  
疎鐘送落暉  
雲林孤跡遠  
法界一塵微  
坐久松風動  
飛花落客衣

山中漫題

讀書期有用  
閉戶耻無能  
落葉空山雨  
疎鐘獨夜燈  
人稱樗里子  
住近石門僧  
靜坐觀詩妙  
須叅最上乘

順昌道中

蓐食鳴雞曉空山啼鳥春遠鐘何處寺殘月獨行人書  
劍嗟黃髮江湖起戰塵南遊未得意北望正傷神

送別趙子將

故人川上別風雨送行舟歲暮歌黃鵠江清見白鷗青  
雲懷楚壁秋水佩吳鉤看爾飛騰志周南豈滯留

雪中送舒文質歸廣信

積雪千峯迥空林一鳥歸客愁南浦樹鄉夢北山薇風

雨荒茆屋兵戈老布衣饑寒兼盜賊出處寸心違

寄雲松先生隱居

風雨論交舊林塘卜築新幽棲兼令弟高卧愧時人竹  
日明書帙浮雲惹釣緡林居無俗客麋鹿自相親

懷川晚立

清川繞縣衙小立共汀沙暝色催歸鳥春愁對落花江  
湖頻戀闕風雨更思家出處成何事惟添兩鬢華

宿蘇橋驛



桂嶺愁人地梅花歲暮天孤雲寒雨外獨鳥暝鐘前牢  
落空雙鬢馳驅又一年觀風愧無補為客記山川

柳城道中作

霜氣晚淒淒荒岡恐路迷孤雲桂嶺北落日柳城西地  
暖蛇蟲出林昏鳥雀棲蠻鄉經戰伐問俗愧遺黎

秋憶西山草堂

山接藍田近泉分橘井清誅茆成小隱鍊藥問長生一  
逕看松入千峯共鶴行誰言江海上歲晚戀虛名

宿嚴灘作

水宿傍嚴灘。風燈語夜闌。  
鼃鳴潮信早。龍過雨聲寒。  
病喜江山好。貧嗟道路難。  
故園三四口。書札報平安。

浮大江之廣西途中作

慘淡西門別。蒼茫廣海行。  
微風孤櫂遠。落日大江清。  
雁帶還家夢。雲留戀闕情。  
悲歌一回首。出處念浮生。

浮江望淮上作

萬古長江險。秋風短櫂經。  
天連一水白。山入兩淮青。  
把酒

酒須明月乘槎豈使星雲霄望不極鴻鵠正冥冥

書懷酬孟原僉憲

一官辭殿陞萬里越江湖暝色青楓近秋聲白雁孤書  
題懷故舊藥裏愧妻孥王事兼詩興虛稱二妙俱

采石舟中寄子正僉憲

共醉黃鱸酒還登采石舟澄江晴吐月獨樹曉生秋去  
國一身遠懷鄉半夜愁明朝陪使節一上岳陽樓

過太平州作

帶雨辭京口觀風出廣西江吞淮樹小城壓楚雲低湖  
冷三秋雁山寒半夜雞宦情兼旅思遠愧鹿門妻

觀音巖

石色依廬阜潮音接普陀江雲晴自遠水月夜還多鳥  
為銜花至龍因問法過瓣香瞻彷彿帆影拂嵯峨

恭城縣

十室黃茆邑千峰紅葉村喧卑蠻俗異質朴古風存雞  
犬連徭洞牛羊到縣門殘年歷荒徼遙布聖明恩

晚立懷友

野曠行人絕林空墜葉聞  
客愁當落日詩思入寒雲  
草暗防蛇毒山昏過虎羣  
梅花萬里道歲晚正思君

過雲洞嶺

路出千林迥山連五嶺遙  
石崖懸度棧野樹卧通橋  
澗飲猶防蟲畝耕盡屬徭  
夕陽驅瘦馬髣髴影漫漫

溪橋晚立

天濶浮雲盡山昏落日微  
鳥棲當野樹人語共柴扉  
歲

月且云暮鄉闕何處歸隣家響機杼遠客歎無衣

宿賀州黃家洞瑞巖寺清溪茆屋悠然有故山

之景

怪石分羣壑清溪共幾家衡門散雞犬古寺入桑麻薄  
宦知無補浮生信有涯白鷗藍澗曲春水遶桃花

旅寓

旅寓真如此空堂思悄然秋聲一葉下暝色數峰連涉  
世方知命清心已悟禪鏡中窺短髮蕭颯感流年

夜雨

多病西風客空堂獨夜愁燈殘江上雨木落嶺南秋黃  
卷知何用丹砂不易求君恩無補報悵望惜淹留

贈隱者

風雲蛇陣將山水鹿門居報國曾留劒歸田始讀書雁  
秋湖水落蟬露柳條疎別夢關山遠松窗夜月虛

雨中

黯黯雲垂野瀟瀟雨滿林晚山歸鳥盡秋草閉門深落

葉蕭條樹空城斷續砧煩憂兼獨立誰識此時心

曉發江上

官船催曉發浦鳥聞驚飛殘月低清渚疎鐘隔翠微晨  
光初辨樹秋色已生衣萬里慚張翰鱸魚未得歸

柳城縣

青山入縣庭小邑但荒城竹覆茆茨冷江涵石壁清  
草蟲當戶墜水鳥上階行問俗知無事松風一舸輕

出雲藤驛



又出雲藤峽扁舟更向東  
地蒸秋有瘴江濶夜多風  
旅夢驚啼狖鄉心託斷鴻  
天涯看月色不與故園同

宿陽朔山寺

晚景孤村僻松門試一登  
秋山黃葉雨古寺白頭僧  
壞壁穿新竹空牀覆舊藤  
宦情與禪意寂寞共寒燈

來賓縣曉發

宦遊同逆旅侵曉逐征途  
空館殘燈小長江落月孤  
鄰雞催去馬城柝起棲鳥  
物色兼人事匆匆歲欲徂

柳州道中

窮荒持憲節侵曉策征驂落月十峰外清霜五嶺南  
草寒初息瘴林曙欲浮嵐巡歷知無補艱難頗自諳

過諸葛古城

諸葛舊屯兵東郊尚古城山餘駐馬跡江有卧龍名  
怪石疑戈甲高雲想旆旌秋風吹大樹蕭瑟獨含情

秋夕懷武夷舊業

客路西風晚懷山獨夜愁露寒仙掌月天遠幔亭秋  
落

葉他鄉夢啼鳥何處樓歸心似江水千里向東流

江上別故人

天涯芳草色對酒惜餘春此日滄江別東風白髮新落  
花晴傍馬殘鳥冷窺人勉矣持風紀驅車莫厭頻

雨中同孟原僉憲登嘉魚亭

高閣流鶯外荒城駐馬前江寒三月雨春老百蠻天折  
柳悲橫笛飛花落釣船乾坤總羈旅把酒意茫然

又

城空花爛熳樓迴雨蕭條  
毒草春生瘴蠻江晚上潮魚  
肥堪把釣鳳去不聞韶  
萬里雙持節恩波賴聖朝

題聽雪舟卷

彤雲凍合山陰道老鶴虛舟夢瓊島  
天地無聲夜寂寥  
短篷碎玉風蕭蕭月白江清墜楓葉寒重不聞葦葭折  
明朝洗耳聽清流寫作江湖聽雪舟

題子陵圖贈嚴伯新

高臺蒼蒼富春渚老樹凝雲苔色古  
客星夜入紫微垣

羊裘暮釣滄江雨大賢隱德辭萬鐘諸孫嘯傲江湖中  
干戈滿地歲將晏展卷山水來清風

同程芳遠遊東林寺

東岡石上松林青偶與白雲來此行老僧下榻雨花散  
古寺閉門秋草生八月風高萬籟急雙谿日落千山明  
歸去橋西一迴首重林杳渺隔鐘聲

寄張茂叔

黃岡處士舊知名似爾文章老更成芸閣蠹魚當夜永

蘭茗翡翠共秋清  
滄江有酒延漁父  
白髮無人薦馬卿  
春晏蓬萊消息近  
斗南時有劍光橫

遊東林寺

隔谿蘭若有雲住  
背郭草堂無酒賒  
秋色琅玕亭外竹  
天香簷蔔座中花  
千年龍象當山殿  
八月鱸魚上釣槎  
一二老僧皆舊識  
松根敲火試新茶

挽盧憲副卒于海北

繡衣萬里接炎荒  
白髮中宵殞瘴鄉  
夢斷玉樓江月冷

魂飛銅柱海天長  
樓船歲晚迎歸櫓  
松桂春陰閉草堂  
欲向滄浪歌楚些  
山空猿鶴易悲傷

簡舊書有感

高閣藏書半不存  
數篇零落更堪論  
閉門風雨梨花盡  
壞壁塵埃竹簡昏  
鳴鳳徒勞思盛世  
獲麟何用紀空言  
文章漫爾疲心力  
陋巷如愚道自尊

拜虛白塔

石逕松林入翠微  
門人卜此窻空衣  
流沙幾日青雲度

滄海千年白鶴歸山鬼夜驚丹氣吐洞雲晴挾劍光飛  
久知生滅原無礙目斷鵲原下夕暉

寄余員外從善

嫋嫋秋風江水波碧雲千里奈愁何空山落葉黃昏雨  
深谷幽人白石歌舉目漸驚朋輩少論心偏感別離多  
船來不得聞清便采采金花滿澗阿

病中作

茆屋黃花共寂寥病容詩思總無聊山童夜靜分松火



道士天寒送藥苗落木荒陂秋澹澹鳴雞空館雨瀟瀟  
仙家瑤草年年長弱水蓬萊路更遙

七月廿八夜同巢翁石父燕集玄都道院是日

雷雨晝晦既夕星月爛然席上作

偶與高人讌武夷天空山水漾清輝金盤曉露蒲萄酒  
玉女秋風薜荔衣雷起石堂龍未蟄蟾生滄海鶴初歸  
瑤臺自有長生籙莫歎尊前往事非

和友人見寄

憂國長懷心悄悄讀書空笑腹便便西風杭稻雲連屋  
秋水蒹葭月在船黃葉閉門幾樹老清溪落日數峰連  
藍田丘壑題詩處喜有高人住輞川

寓秦石村作

盤石垂蘿一逕分野橋流水數家村人烟橘柚寒連屋  
仙掌芙蓉晚對門屢辱故人留藥價空煩漁父問桃源  
多情惟有西溪竹春雨年年長子孫

寄野士弘壽南山二左司

久無書札問平安，獨向雲霄望羽翰。  
潮落魚龍三島近，月明烏鵲一枝寒。  
斗南共識張華劍，林下空彈貢禹冠。  
憶別滄江秋已晚，黃花紅葉露漙漙。

次梁天與峻德郎中遊武夷韻

一夕仙橋架綵虹，千年洞府閤神蹤。  
秋沆瀣金人掌，明月芙蓉玉女峯。  
霧雨至今藏虎豹，風雷何日化魚龍。  
山中尚有長生藥，安得乘雲獻九重。

經郭先生平川舊居

皓首明時祗布衣孤墳宿草又斜暉塵埃几杖遺書盡  
風雨園林舊業非九曲月明猿自弔三山秋晚鶴空歸  
多情惟有門前水春色年年上釣磯

答海月大師貽詩問訊

柴門屢枉故人車草澤元非隱者廬方士許傳鴻寶訣  
名山自讀馬遷書十年兵甲皇威遠二頃山田歲計疎  
賴有忠良扶社稷不勞音問到樵漁

送霍拱辰歸建安

文星光彩動皇州  
博士曾同萬里遊  
曉日蓬萊丹鳳閣  
西風苜蓿紫霞洲  
船經吳越千峰雨  
水落瀟湘一雁秋  
兩地相思各迴首  
殘蟬衰草共離憂

廬山詠懷古跡

匡廬山色枕寒流  
晉代衣冠尚古丘  
三徑清風陶令宅  
九江風月庾公樓  
波吞故國魚龍晚  
草沒荒城虎豹秋  
聞有東林僧舍近  
閒尋五老共清遊

夜泊武昌城下

蒼山斜枕漢江流自古東南重上游巫峽秋聲連戍角  
洞庭月色在漁舟白雲黃鶴悠悠思落木啼鳥渺渺愁  
獨夜悲歌形勝地燈前呼酒看吳鉤

吳山懷古

南渡山川王氣消西風松柏認前朝紫宸無復千官宴  
滄海空餘半夜潮龍去蓬萊曾駐輦鳳歸寥廓不聞簫  
上方樓閣依稀在暮雨疎鐘送寂寥

封陽驛

官船早發渡頭沙  
迴首東風日又斜  
千里雲山橫桂嶺  
一江春水漲桃花  
荒村雞犬臨歌岸  
細雨鳬鷺傍釣槎  
南望蒼梧烟樹晚  
鳳韶何處弔重華

宿開建江上懷閩中故人

東風嫋嫋泛鷗波  
倚棹汀洲近薜蘿  
江上流鶯疎雨歇  
天涯芳草落花多  
暮雲尚隔蒼梧野  
秋興空懷白苧歌  
離別不堪頻悵望  
美人南國意如何

呂仙亭

洞庭萬里連滄海石室千年隱翠微  
華表月明笙鶴下蒼梧雲濕劍龍歸  
城南老樹名空在枕上黃梁夢已非  
倦客遠尋勾漏洞丹砂未就與心違

梧州歸至龍門驛作寄諸同志

江轉龍門一櫂輕歸心不為杜鵑聲  
斜風細雨催離別剩水殘山管送迎  
但使百蠻稱鎮靜久知東海望澄清  
碧雲日暮蒼梧遠不盡懷人渺渺情

寄衡山李中卿



謫仙歸去卧松窠江上飛花送錦袍  
細寫山川成史記更吟蘭杜入離騷  
洞庭萬里秋風落衡岳千峰夜月高  
欲託瑤琴記相憶海天清露鶴鳴皋

入義寧山中

疎篁古木抱雲岑野店山橋入桂林  
青草江山春瘴裏落花風雨夜寒深  
一官便擬歸田計萬里長懷戀闕心  
却憶故人霄漢上霜臺翠柏曉森森

懷西山草堂奉柬山中二兄

多年採藥問長生野鶴孤雲入幔亭夜雪梅花虛室白  
秋風竹簡古書青祗今遠道生華髮何處空山長茯苓  
喜有藍田雙壁在每從南極望春星

麻原歸隱圖為程伯崇提學賦

清名奕世荷君恩白髮他鄉卧掩門故國江山愁杜宇  
孤村風雨憶麻園紅泉釀酒分松腋翠石題詩雜蘚痕  
歸去茆齋第三谷玉山清露長蘭蓀

題蜀江雨霽圖

瞿塘雨過起春濶空翠樓臺杳靄間  
萬里橋西花似錦  
暮雲依舊隔巫山

江上對雨

北辭京國秋將晚南望鄉關路轉遙  
倦客長江對疎雨  
荻花楓葉正瀟瀟

春日草堂

水色山光澹澹清池塘雨過草初生  
東風茆屋春多少  
喜聽流鶯第一聲

癸丑元夕柳州見梅憶澤

忽見繁花亂客愁  
東風寂寞古龍州  
故園樺子無消息  
坐對寒江月滿樓

憶橘樹

橘樹新移近草堂  
開軒時愛午陰涼  
春來應是花如雪  
吹落蘇耽井水香

江上晚景

疎雨殘雲共晚風  
長髯烏帽獨掀篷  
江山絕似元暉畫

浦樹沙禽慘澹中

折杜鵑花

對江松樹兩三家背立東風數暝鴉  
草綠故園歸未得臨流愁見杜鵑花

懷山中

久別山中鸞鶴羣清齋自禮武夷君  
澹江明月扁舟夜渾似松窗卧白雲

石倉歷代詩選卷三百十一

欽定四庫全書

石倉歷代詩選卷三百十二

明 曹學佺 編

明詩初集三十二

陳伯康

陶淵明田居

吾慕陶徵君拂衣輕去就棲鳥戀舊林歸雲忘出岫巾  
車返柴荆環堵植松柳東臯課種苗南山歌種豈田父

時過門葛巾與漉酒五斗愧折腰浮名果何有

登三水釣鼇臺

高哉釣鼇臺桀立幾百尺秋風一登臨浩蕩望不極吾  
聞蘇老澗乃是任公匹投竿江海濱長嘯宮宇窄古篆  
今莓苔佳句餘金石歲月驚逝波山川付陳跡牧童暮  
敲火樵子曉吹笛杖藜重夷猶把酒緬疇昔商歌正雲  
林天空露華白

讀史二首

周公躬吐哺四海心歸仁三叔乃流言豈非骨肉親仁人視天下萬物猶一身不仁身奚有況復思弟昆棠棣興孔懷鵠鷄念恩勤聖人之所為口實徒亂真

趙高利少主矯制誅扶蘇一念誤國人三說感李斯望夷眩鹿馬赤族誠天誅吾聞金日磾出身本降俘霍光受遺詔共負成王圖大哉社稷臣戒之用小夫

伯茂餞仲器歸萊山和韻

我居西山前君居南山下居止既比隣歡笑復杯掌雖



無籍籍名亦愧栖栖者吾道多艱虞造物隨取舍努力  
少壯時青燈共良夜

汴河隄

汴河隄隄何長隄中水枯隄草黃錦纜牙樯不復返車  
輪馬跡東西忙忙處多人自辛苦過眼繁華草頭露文  
梁猶是揚州門揚州不見瓊花樹汴河隄長亭路千古  
光陰自朝暮

秋千辭

梨花庭院香飄滿架架秋千笑聲軟紅粧共鬪青草妍  
長繩欲繫白日短掌中飛燕旋風斜樓外綠珠墜落花  
素娥弄蟾奔竊藥秦女乘鸞初去家半空着脚看亦好  
平地失身更顛倒人生行樂貪少年昔時女伴今皆老  
慵來聽說摧眉峰整頓衣裳為歛容玉樽餘酒醉不得  
月明高架粉牆空

社日

燕子來時二月天家家禱社楓林前香霧遶壇散靈雨

孟酒豚蹄候神語父老殷勤拜社公但願今年年歲豐  
歲豐不但衣食飽官府租稅亦易了了官之餘但力田  
秋報春祈得社錢

銅爵臺

鄴中高臺鑄銅爵碧瓦朱甍照城郭東風吹上綵雲高  
君王不愛宮中樂年年遊幸朝復暮夕陽忽在西陵樹  
舞影歌聲逐水流芳草萋萋迷輦路總帷尊酒空淚頻  
征西曩是英雄人生前已取無天命死後終知有鬼神

君不見關中魂魄猶思沛莫向西陵呼萬歲

蘭亭

會稽內史多高情山陰脩禊開蘭亭晴暉絢綵射藻井  
茂林脩竹圍春屏山椒引泉碧雲裏羣賢結佩臨清泚  
羽觴隨波白日遲蠶紙揮毫畢能事滔滔逝水隨東流  
絕代衣冠成古丘當時絲竹輟遺響千年草綠空山秋  
華胄蟬聯天上客南鎮雄藩羅畫戟揮麈傳杯坐賦詩  
碧瓦朱欄換陳迹今之視昔後視今今人亦復多古心

人生富貴行樂矣何用屑屑悲死生

北邙行

洛陽城北北邙山死者葬送生者還人生住世誰百年  
舊鬼翻為新鬼憐高墳纍纍卧羊虎松下便房竄狐鼠  
經年翁仲默有靈夜半遊魂哭相語嗟爾遊魂聽我言  
不須涕淚收爾神洛陽車馬日紛綸北邙得葬能幾人  
黃金白壁買歌舞身後無錢置坏土王侯第宅多新主  
那得丘山如子所君不見三閭大夫葬魚腹葬爾北邙

爾勿哭

明妃出塞圖

昭君生長昭君村漢宮選入昭陽門傾城自負顏色好  
薄命不得承君恩朔風吹動氍毹車發萬里遠嫁單于國  
香夢空迷紫塞雲蛾眉愁對穹廬月關山阻隔歸無緣  
含情掩抑鳴哀絃虎頭將軍骨已朽獨餘青塚留千年

鴻門宴

鮑魚吹腥秦失鹿大蛇中斷神媼哭函谷泥丸一旦開

軹道降人帝車覆江東子弟空八千入關有約如王言  
三章約法慰父老鴻門一宴聊殷勤項莊酒酣拔劍舞  
屠狗壯士怒裂背腰間寶玦空三回君王不忍徒為爾  
夜游霸上杯不勝幾踏虎尾行春冰孰知大運終四百  
事有天定非人能咸陽宮殿火三月玉斗無聲楚歌歇  
霸業蕭條王業成楚漢興亡兩分轍

桃膠香鬟歌

深閨美人春睡起側倚銀臺注秋水鬢鬆兩鬢霧半垂

欲下犀梳不能理春雲暖雨桃膠香調蘭抹麝試新妝  
豈無膏沐汚顏色思此佳人日斷腸君不見望仙結綺  
螺千斛隋家但寫雙蛾綠白髮宮人奈老何轉頭依舊  
庭花曲

秋江送別圖

江河望在眼關山渺難越客子遲歸期孤櫂已先發天  
秋木葉丹露夕芳草歇美人勞我思迢迢烟水濶

贈洛陽鄧知縣械之京



聞說洛陽令三年政已成循良今漢吏風俗古周城驛  
馬雲山迥官船雪水清朝回去紫闕父老定相迎

寄邠縣喻知縣以貴

寄語邠州長何時過洛中相看兩舍許不得一尊同客  
思瞻秋月鄉書遲早鴻單懷臨別處每憾太匆匆

寄遜齋陳景明兼東東園陳景獻

君家古清友攜共阿咸遊遠道隔千里別懷長九秋故  
交如夢覺往事若雲浮最憶東園老相思成白頭

奉和伯弘宗兄韻

喜共江山住相邀不遣童栖遲浮世事寂寞古人風步  
屨幽亭上吟詩高閣中濁醪時慰意豈必學陶公

泚溪橋美林郎中德齋先生

牛角山陽泚溪路溪水冬寒不可渡北風幾見揚沙塵  
日夜奔流海東注美人晝錦歸故鄉飛梁壓水高行步  
鄭國公孫陋乘輿蜀中司馬看題柱

阮山寺

阮郎舊隱青山裏故宅如今是佛家似有天人散花雨  
若為溪女飯胡麻南湖秀色明春樹西崦晴光賸晚霞  
老衲每談因果事紅塵滄海使人嗟

表姪羅師尚辟四川掾

捷音指日定成都坐見降王屬傳車子去驚傳三語掾  
人來喜得萬金書馬嘶古棧秋風晚舟次瞿塘夜雪初  
若到昇仙駐吟轡不教題柱愧相如

遊湧泉寺訪僧不值

萬石岡頭紫翠圍  
白雲杯水護柴扉  
石爐火冷僧初定  
野逕苔荒客到稀  
遶山泉浮湫澗隔江雲  
樹入霏微  
我來豈是叅禪者  
笑倚長松看鶴飛

遊神光寺登道山亭讀曾南豐先生撰碑

不見神光解吐虹  
滿亭苔蘚舊遊空  
職方諸貢歸王會  
賢守遺碑見土風  
城郭尚存人物異  
江山如故古今同  
欲將往事增惆悵  
望斷烟波沒去鴻

歌風臺

高臺秋日草荒涼故老猶能說漢皇歌罷三侯悲擊筑  
身居萬乘更思鄉長陵魂魄風雲往原廟丹青歲月長  
往事徒勞增感慨寒城幾度立斜陽

月夜江上聞簫

西江短棹倚江干卧聽樓頭玉琯殘歌斷吳門人罷市  
珮空秦館客憑欄魚龍擾擾秋潮落鸞鳳雙雙夜月寒  
聽徹古今無限恨高陽且付酒杯乾

靈峰寺

海上神山十二奇高僧卓錫話當時樓臺近映黃姑水  
香火猶存白馬祠山逕嵐開松檜老石林風暖荔枝垂  
野夫未解真如性方外交慚惠遠師

次鍾南十兄韻

坐穩臯比身懶動滿庭春雨長苔衣苦吟不信詩能瘦  
戰勝方知道解肥春飮滿盤堆首宿硯池香水貯薔薇  
踈慵自乏當時望不是孤高與俗違

寄淇縣胡知縣原長

悠悠淇水沫之鄉無復詩人賦采唐多士已譚周禮樂  
郎官應選漢循良花栽春雨文書靜竹送薰風枕簟涼  
相望宜陽渾咫尺夷門把別意何長

遊西湖登寶東塔過湖山一覽禪房

層層金碧聳烟霞俯瞰樓臺十萬家落日僧餘化城飯  
頻年客喚趙州茶春隄楊柳看泥絮秋水芙蓉勝雨花  
笑我鳳凰臺上客也來趺坐聽楞伽

過嘉興嘉禾驛

秀州城下水平河桑繞長堤麥覆坡義士不聞傳槁李  
居人猶見食嘉禾且須鸚鵡杯中物莫逐鴛鴦湖上波  
一笑吳歛掛颿去滿天風雪奈儂何

過富春

好山猶記富春名碧嶂清波滿縣城越樹遙連魚浦暝  
浙江低入海門平客星寂寞千年事仙槎夷猶此日情  
試問吳儂學吳語湧金門外好聽鶯

古戰場



此地曾經幾戰塵  
離離荒草不生春  
平沙日落黃雲斷  
燐火如星出近人

立夏喜晴

剌雨殘春送五更  
晴光入夏似相迎  
綠槐門巷南薰細  
又聽新蟬第一聲

重過草亭

池上柳枝新種得  
絲絲金縷曳春暉  
樂天老去風流減  
懶看飛花上舞衣

過洛陽

甲馬營中紫氣消  
銅駝巷陌草蕭蕭  
何人共看天津月  
杜宇無聲夜寂寥

過淮北

長淮岸北駐征驂  
山色回看淨若藍  
為問故鄉何處是  
三十里外隔江南

餞中書寫誥趙彥珍

奉天錦誥出黃麻  
五色晴雲絢紫霞  
綵筆承恩香染處

金匱要略卷之三  
掖垣初日上葵花

送代北鎮撫沈將軍

代北山南十八州雁門關頂四時秋  
沈郎帶眼渾依舊  
領得千軍紫塞遊

附陳仲完詩

仲進公從弟諱完以字行有簡齋集

題畫

久憶故人情茲焉發幽興  
抱琴渡危橋望入藤蘿徑  
溪雨倏已晴雲收千嶂淨  
喬木生晚涼松濤滿清聽  
之子

不我逢隔籬雞犬靜

題山水

危峰倚白雲秀氣橫清秋俯見岷蜀晚仰觀河漢汭朝  
日海上出蒼然藹林丘陽崖散金碧陰壑晴光浮中有  
殮霞客母乃仙侶儔我欲一見之道遠從無由安得同  
心人攜手窮冥搜

湖山佳趣圖

微雨息市氛晴光溢水木暫輟童冠書少豁林泉目我

哉南北峰影浸西湖綠嶺外號長松霞邊起孤鶩荷香  
隱綠舟鳥鳴逐絲竹興竝坡老遊吟步逋仙躅落日度  
寒鐘悠然自天竺

送虞大令之廣濟

六月暑氣盛炎雲朝夕生居家苦蒸鬱况有千里行疇  
昔在家林子時方秀發相去二十年老我之華髮子行  
固不遥宰邑蘄陽間蘄民待新政稱治良獨難乃祖舊  
龔黃賢孫今卓魯昭哉循吏傳視今猶視古

送方教授之樵城

飛雪迷川陸寒飈鳴樹巔連鑣出白下送子歸樵川憶  
昨東觀遊同心復同調窮窺秘閣書載發金門笑大典  
時云畢對酒成別離孤舟日東逝後會竟何時君採泮  
水芹我弄玉堂月曷以摠所懷鱗鴻未應輟

與陳司訓桃林之會

南飈掃朝雲大日鳴穹昊宗盟列玳筵入我城東道偉  
茲汗漫期况是同鄉好林深酒氣香葉密蟬聲噪暫陪

簪紱遊恍若蓬萊到何當駐殘陽為君倒懷抱

愛日堂為秋官李主事作

冬日既苦短夏日孰云長流光逐逝波崦嵫倏扶桑眷  
言堂上人秋髮雙垂素志養期無違豈在羅三釜盼彼  
反哺烏啞啞鳴樹顛微物尚有情子職寧或愆親壽逮  
期頤載喜還載懼去日不可追來日何由駐安得魯陽  
戈為我延夕暉誓將日為歲庶以伸吾私

溪田過雨圖

時雨忽已徧羣山朝來晴溪田漲新綠溝澮悉皆盈悵  
茲天氣暄布穀聲嚶嚶黽勉事東作孰計勞其形浩浩  
谷口趣猗猗丈人情竭來應徵辟遠入嵩陽城寫圖想  
舊業千里雲烟橫

賦得空江秋笛贈鄭浮丘助教

大江白露下秋氣橫中流脩然一笛響遠自江上舟洲  
前向晚霽涼雨三弄分明作人語思逐飛鴻海際來聲  
隨白鳥雲邊去須臾引羽轉清商蘆葉撼撼兼葭黃驚



金史卷一百一十二  
卷三百十二  
迴少婦孤蓬夢攪斷羈人萬里腸駐宮又復變流徵銀  
河澹澹天如洗猿鶴秋吟絕島雲蛟龍夜吼寒潭水祇  
今誰識桓伊心悠悠人世無知音曲終徙倚重回首落  
月蒼茫烟靄深

石城釣隱

野客隱雲林幽溪遶石城時垂嚴瀨釣絕似渭川情月  
冷舷逾響天高笛倍清滄浪如可濯子亦解長纓

題凝清軒

凝清新揭扁軒舍倚雲開爽氣西山入涼颺北牖來晝  
閒泉在沼琴靜月當梅允矣丘中賞符茲物外遊

嵩陽詠羅寺晚鐘

諸品上方夕微鐘出瑤嶺聲隨孤鳥空梵逐羣機泯時  
有獨歸僧月明步蘿逕

葛村夕照

崎嶇葛村路路小行人稀閒門帶晚照獨樹留餘暉何  
處笛聲起牛羊迤邐歸

錢唐懷古

邊塵捲地北風遙信馬南來駐六橋汴水故宮空有月  
海門沙溆寂無潮銅駝夜泣霜華冷銀雁初飛王氣消  
五國城頭魂不返傷心誰賦楚詞招

蒲執玉先生植蘭軒

幽軒小構倚雲林植得猗蘭愜賞心九畹餘馨留古佩  
半簾殘露襲寒襟夢回香氣連書幌坐久清輝入夜琴  
與子也知同臭味何妨楚澤共行吟

潁上感懷呈王安中陳叔諒陳敬脩暨在泮諸

友

遙辭紫禁出都門  
索莫窮居潁上村  
鄉國音書何日到  
詞林朋舊幾人存  
夕陽遠水連寒雁  
落月疎鐘叫夜猿  
自歎浮踪如斷梗  
不須惆悵暗消魂

送文玉姪來青亭

若人棲隱構來青  
門外諸山儼畫屏  
白日長懸徐樺榻  
清風如造子雲亭  
松杉雨後雲連壑  
楊柳春前水滿汀

只恐鶴書天上至草堂從此負山靈

送族孫格還鄉

拜辭膝下思淒迷望入閩關是故溪莫忘白門分手處  
綠楊殘照乳鶯啼

附陳孝思詩

諱登仲進公之長子也  
有石田集

賜元夕觀燈

鼇聳三神秀巍巍鳳閣前四時調玉燭萬斛吐金蓮寶  
樹祥光燄璇穹壁月圓九重臨黼扆百辟侍瓊筵桃熟

來王母雲開擁列仙宸章飛琰翰大樂奏鈞天瑞氣浮  
雙觀歡聲動八埏戲陳農社樂詩頌帝京篇願効封人  
祝皇圖億萬年

應制賦白象

聖主臨天位仁恩被八荒明時呈異質瑞氣感瑤光貢  
獻辭炎服梯航入帝鄉色連螭陞瑩清比玉麟祥漢室  
誇丹鳳周家詫白狼方今昭至德遠物自來王願効封  
人祝華夷永樂康

送陳教諭廷傑還湖口

湓江敷教雨京國重吹噓  
共載詞林筆新成大典書  
賜金分內帑置酒駐行車  
惆悵都門別那堪迫歲除

題浙津歸權巷

鄉園何契濶客路重綢繆  
暑雨三橋月涼風孤館秋離  
筵燕市酒歸權浙津舟明到睢陽  
郡題詩慰別愁

送宇文崗還朔州

都門秋欲盡雨雪已霏霏  
顧我同為客憐君未授衣  
計

程還朔漠歸思繞庭闌別去重回首長空一雁飛

寄二甥

不見吾甥久相思欲斷腸龍龕曾聽雨雁塔憶傳觴白  
水心常在青氍毹業豈荒他年省宅相不獨魏元陽

送高廷禮應薦之京

首石峰南祖帳開山花隄柳送離杯百壺酒盡青驪遠  
五綉風來彩鷁催楚國舊傳徐穉隱漢廷今重賈生才  
新詩不待函題寄乘興同吟到鳳臺



送陶仲鈞還長樂

文園多病歎相如，栗里何人問索居。  
長樂稻田餘舊業，毗陵瓜地復新鋤。  
看花況是春風後，歸棹偏逢夜月初。  
何事都門又成別，臨歧無語獨躊躇。

送林邦楚秀才以書成還吳航予將北上

鳳臺臘盡曉霜微，芳草新年染客衣。  
我逐離聲隨北上，君將行色賦東歸。  
吳中斗酒聞鶯醉，嚴瀨孤帆背雁飛。  
若到閩中誇盛事，相逢休道故人稀。

題蘭溪鄭仲循廬隱卷

東郭高人結草廬不嫌紛雜市廛居  
宅邊種得先生柳戶外時迴長者車  
半榻琴樽聊爾爾一庭風月自如如  
日來曉起渾無事課得兒孫讀舊書

夢徐道行

廿八人中最白眉相逢每恨識君遲  
虛心猶抱霜臺節直道因懷國士知  
東角趨朝同獻納西清退食自委蛇  
年來不道交游少爾獨頻頻入夢思

隱居

龐君居鹿門鄭子耕谷口西山蕨正肥此樂君知否

溪居

綠水映柴門青山繞環堵機心久已忘白鷗是吾侶

客居

星霜兩鬢皤迢遞關河阻孤館動歸思芭蕉滴秋雨

舟居

生涯一葉舟五湖烟水濶扣舷歌滄浪波光漾秋月

戍居

長驅桑乾源破敵飛狐口萬里清烟塵月明擊刁斗

閨居

欲妝臨鏡慵畏見朱顏老無語下瑤階所思在遠道

送呂城壩官還舊治

秦淮臨別處月落早潮平離思如潮水相隨到呂城

題黃典籍東州野堂圖

東州州上野堂幽卷幔湖山翠欲流京國到來鄉思遠

白雲黃葉夢中秋

寄前山陳孔階

每憶相邀共嘯吟  
白雲生處老松陰  
寧知別後相思意  
漢水東流日夜深

送陳繼初赴京

憶陪大阮竹林遊  
興入西湖上小舟  
今日白門分手處  
隨君清夢滿滄洲

寄靈峰無垢上人

生公說法闡師宗，色相從前隔幾重。  
遙想龍龕纔出定，又還飛錫下靈峰。

送晦堂禪師還柏山

龍河花下送師歸，吳楚千峰一錫飛。  
到日親朋如借問，鄉心迢遞宦情微。

題林洞虛碧蘿猿洞處

九峯溪上鬱嵯峨，洞口陰陰長薜蘿。  
聞道仙成猿亦去，石牀丹竈碧苔多。

送池景大之淳安訓導

酒盡都門惜解攜  
客中送客意淒淒  
明朝疋馬嚴陵道  
無那青山杜宇啼

竹枝詞

別郎春盡似經年  
暗擲金釵當卜錢  
分明說在吳江上  
知有江頭若箇船

送謝秀才南歸

雪霽秦淮野水生  
客中無奈別同聲  
離心也似雲邊雁

隨爾南歸向粵城

附陳思濟詩

諱航仲進公次子也有溪山集

題商山四皓

引領盼層巔遙見四老人蒼顏映綠水一一嚴衣巾望  
之即再拜重其古先民或云黃與綺于此避強秦至德  
尚可想遐蹤浩無隣翩然若儀鳳覽德翔秋旻亡國失  
大老興邦得祥麟威容動黼扆問荅何精神明兩有餘  
慶偏愛遂淪湮至今仰遺烈英氣猶振振



題嚴子陵

飲盡桐江水采徧富春山不羨波底魚難垂手中竿耕  
鑿有真樂衡茅無苦顏一朝遇物色千里涉河關下車  
竟不屈特立人所難遂令天下士千秋仰遐觀

虎溪三笑

遠公禪門秀宴坐東林裏絕迹避喧囂不渡虎溪水抑  
且偶忘形相邀過清泚忽聞於菟聲大笑不能已元亮  
幘欲歌脩靜冠將委丰采動林巒聲音響涯涘逸韻當

時稱高風後人紀載瞻撫斯圖詠歌仍仰止

古錦詞

妾有一匹錦欲作春風衣珍重不肯着十載藏光輝時  
時自拂拭彩色生羅幃不繡閒花草只作雙鴛飛天寒  
針線冷誰念妾心違

塞下曲

長城連大漠紫塞控邊陲千騎黑旃軍落日轅門裏不  
戰氣偏驕角逐心更喜嘗聞衛霍功得遇風塵起如今

息功利令人愁欲死

結交行

古人結交重相許  
刎頸捐生後人慕  
傾心瀝胆過弟兄  
意氣昂藏誰敢顧  
一朝勢去事稍移  
外貌未變心已離  
臨危忽作安身計  
前時相許成相欺  
君不見張耳陳餘  
最相愛印綬畢竟何人佩

春風顛歌

平生不信春風顛  
日日買醉春風前  
今朝始信春風惡

桃花作雨柳飄綿衝狂擊盪上復下澎湃奔騰如怒馬  
恍疑威動四極陸又若氣振長平瓦遊人郊外意頗愁  
巨觥起浪難獻酬不如挈榼且歸去呼童載酒登南樓  
賦得石上草

石上草何營營團團翠碧沿岸生年年雨露滋不長歲  
旱乾枯應復萌根托紫泥裏葉並白雲橫恍疑九節長  
生餌又若芝朮搖金莖老夫不可結樵子難為薪豈是  
天公愛靈物護此石上千年春

丙戌金陵作

金陵大道平如砥，翠瓦雕甍相對起。  
甲第縱橫盡主家，金鞭絡繹多戚里。  
主家戚里遙相連，平隄走馬去朝天。  
騎簇通衢看似繡，香連內苑色凝烟。  
烟連騎簇真堪玩，倏忽朝回更蕭散。  
五侯賓從集如雲，四夷門館多迎款。  
須臾教樂從天來，齊歌趙舞皆柔諧。  
愧我儒生眼未識，日逐羸馬隨飛埃。  
飛埃撲人心草草，風光只在長安道。  
故鄉回首白雲遙，歸去南山且終老。

# 大溪山

大溪昔日風光好十家五家同一保雞犬相聞達曙喧  
曉鐘遞擊無昏早山人居山只食山種得稻梁心亦閒  
取柴斫竹白雲裏築埧分泉綠樹間山人于此自云樂  
飽食安眠甘澹薄里胥無復夜驚呼足跡都忘到城郭  
梵宮禪伯亦風流輒與文人相唱酬僧堂懶作六時禮  
客館偏能幾日留吁嗟此事猶眼見倏忽光陰去如箭  
至今惟有三家村出入豺狼心膽戰相逢路上多含哀

辛苦如何說得來只將筋力付流水空把形容同死灰  
龍龕禪寺追和王高二太史題壁詩

海上靈山孕神秀萬木蒼蒼碧雲溜山頭霽色襯朝霞  
樹裏嵐光宜晚照塵囂迴隔絕纖埃金仙之宅如蓬萊  
神房半自花間出定室多從松下開勝槩岩堯真絕境  
目極神馳興俱永飛巖踏上聽天雞疊巘攢雲愁半嶺  
終南太華休爭奇其中佳趣人不知岩扉靜掩薜蘿月  
法水光涵祇樹枝不用傷心怨遲暮且須載酒隨玄度

玉堂詞客解長歌揮灑何須便歸去自笑狂吟非等倫  
麗句從來貴有隣他年詔許還山日結社應須訪舊人

題山水扇面

林下春風來千年翠如壁雲擁羣木深溪迴百川寂中  
有幽人居清朝此投迹邂逅得良朋於焉咏嘉客

感興

灼灼道傍花依依隄上柳繁華耀一時誰人不回首顏  
色信可憐春風不長久有酒且自斟毋為歎衰朽



後出塞

荷戈出門去親戚送我行各攜一杯酒相勸事長征戰  
馬飲河朔邊塵暗東京努力報奇策一掃欃槍平

竹寺春耕

清溪深且廣遊鱗無曝腮洋洋各自適既去仍復來緬  
彼垂釣翁終日坐蒼苔安知投緡意不與古人偕

玉溪晚釣

西山宜落日乃在桑榆間泛泛霞彩動啞啞飛鳥還倒

影麗穹漢餘暉徧岩巖安得魯陽戈揮之起顏顏

山中作

空谷何曾出深林但隱栖采樵探古穴把釣傍清溪雲  
氣侵衣重山容入戶低只緣忘世事不是慕夷齊

山莊訪友

隔水問柴荆行行認犬聲野花當戶發谷鳥傍人鳴地  
僻堪招隱朋來暫輟耕惟應三徑裏斗酒話平生

秋興

龍龕高聳出煙霞御國低徊接海涯淺草牛羊隨處放  
深林猿鶴自成家江潮洶湧朝仍暮沙逕逶迤曲又斜  
年少此遊今白髮倚筇無奈數歸鴉

再東帶湖主人

休文何事減腰圍每日高樓坐不歸愛客真如忘寢食  
對人渾若不勝衣凭欄細數桃花落卷幔間看越鳥飛  
似此清幽猶恨少深移釣艇傍苔磯

江村即事

平蕪縹緲浩無煙禾黍高低徧野田  
媿婦携筐遵小徑  
農夫荷鋤覘荒泉場坡瓜熟風當戶  
滄海漁歸月在船  
更喜清時無寇警長江迤邐得安眠

和贊善叔父尊韻

千里懷人念故鄉應多感慨遇重陽  
殷勤盡在詩編裏  
目極南天憶雁行

山水圖

數里平沙接遠村千重喬木蔭柴門  
可人最是滄洲晚

潮落依稀見水痕

石倉歷代詩選卷三百十二

欽定四庫全書

石倉歷代詩選卷三百十三

明 曹學佺 編

明詩初集三十三

陳全

送叔韜兄歸長樂

攜手出都門，悵然千里心。  
悠悠河橋上，送子歸故林。  
維時初夏交，天宇無氛侵。  
川原翳衆綠，灌木澄幽陰。  
滄波

渺離思黃鳥鳴好音撫景易為感念別亘冲襟亦有盈  
樽酒對之不能斟我家南山下白雲澹遙岑別來幾何  
時歲月忽已深誓將隨爾歸焉得辭華簪遙持一書札  
因之南飛禽

送林遵性之趙州高邑

先生本章縫卓犖不世見胸中三百篇了了毛萇傳手  
持天人書欲獻明光殿何意領微官飄然出畿甸別來  
幾何時鬢髮各已變徒有白下尊留君不成宴北上風

土寒茲行慎霜霰予愧在詞垣知君不能薦

周鍊師九峰書隱

九峰碧嶙峋清暉亘墟落上有仙人居梯巖架樓閣吾  
師紫霞客鍊形卧丹壑樵采幾春秋心與雲無著朝拾  
澗底薪暮煮爐中藥有時釋芥柯長歌振寥廓都無朝  
市喧而多山水樂愧我絳華簪不得隨鸞鶴何日賦歸  
來投身永棲托

題樊可久滄浪秋興



滄浪有遺逸興與滄浪深恬然萬慮遣曠矣諧遠尋澄  
江輕舟移秋水清人心機忘趣自適魚鳥隨浮沉蕭蕭  
蘆葦鳴悠悠鴻雁音所願得其樂時復彈吾琴浦口見  
新月扣舷發長吟回撓泊孤嶼餘聲澄碧林

南徐霽景送章先生歸紹興

金陵際南徐縱我千里目吳會連百城丹陽曠平陸蒼  
茫散曙霞滉漾耀晴旭北固遠逾青練湖澄更綠微風  
引輕帆長天澹孤鷺側聞京口鐘復聽陽關曲歸興滿

山陰令人想芳躅

題衛之弟雲松軒

夢寐登匡廬松徑日已曛  
白雲澹巾舄紫氣恒氤氲  
芙蓉鏡中落瀑流天上聞  
依稀見嵐嶺杳靄仙源分  
猿飯寒澗下鹿行清溪濱  
陽巖散霞彩陰洞滋葦紋  
忽值謫仙人石牀酒微醺  
翩然向予笑遺以漆書文  
自愧非道流何能離垢氛  
覺來玉堂空槐月涼紛紛  
吾弟獨蹇舉脩然卧松雲  
孤閑林壑姿偃蹇鸞鶴羣  
何時會連枝與

爾同清芬

解珎奇秋江晚釣

澄江澹夕波危峰逗煙景孤坐一竿秋微風鬢絲冷釣  
國非所任濯纓趣方領長嘯山月高蒼茫楚天迥

張彥炳福泉書舍

結宇近山麓而無塵事侵鉤簾挹空翠白雲生遠林牙  
籤清晝永燈火間堂深泉聲雜春誦野趣共朝吟陽崖  
瀉飛瀑泠泠入孤琴地偏見馴鹿樹密宜幽禽悟茲靜

中境契彼塵外心念子金閨彥妙齡尚華簪別來故園  
夢夜夜南山岑

送陳履中太常

祖席金陵春買棹秦淮曉故國天外遙片帆望中小白  
雲澹遠岑煙樹帶歸鳥長嘯歌考槃微風度林杪

臨清軒

結宇臨迴溪溪水綠且深晶明漾天鏡洞徹清人心寒  
潭逗雲影遠樹澄夕陰房櫳襲餘潤爽氣凝冲襟境靜

意自適魚鳥隨浮沉時將水絃理或和滄浪吟於焉得  
所樂聊用忘華簪

挽蘇伯厚先生

寒暑有代謝節序易蹉跎夫子乘運化悽愴將奈何生  
存簪組榮死沒歸山河向來歡娛人零落亦已多西日  
不返照逝川無停波惆悵魂若存感慨成悲歌

送陳積中歸省

攜手出都門送子歸故山故山渺何許白雲蔽層巒所

念定省曠豈傷道里艱歸興自飄逸離懷徒慨嘆南風  
吹行舟去去不可攀晨發伍子祠夕憇嚴陵灘松陽鬱  
喬木陰陰翳柴闕登堂展嘉慶喜遂庭闈歡而我別慈  
侍三載何當還感茲五情熱惻愴摧肺肝因聲寄天末  
佇望南歸翰

桑林書屋

結宇桑林間垂屏絕紛擾地偏見馴鹿春至鳴好鳥橫  
琴露氣繁捲幔煙光曉有時聞吾伊琅琅度林杪其當

謝清輝振翮青雲表

題送陳希道歸玉融二首

祖席金陵秋解纜  
秦淮曉故國天外遙  
片帆望中小惆悵  
未能歸雲濤空浩渺

右秦淮棹別

浮雲本無心飄揚隨所適  
朝出鵝原陰暮歸雁峯夕感  
物傷我懷離情豈終極

右閩嶠孤雲

送林漢遠南歸

晨興出都門駕言送之子  
離思亘冲襟滄波渺千里非

無葵藿心  
慙爾問桑梓  
祖席白下亭  
買櫝秦淮疾  
風吹征帆  
倏忽閩江水  
丘隴思彌深  
雲樹情曷已  
佇立空踟躕  
因之歌陟屺

題羅汝文山水

飛夢凌匡廬  
晞髮五老峯  
長天散氛翳  
削出金芙蓉  
林谷轉森邃  
溪迴路彌通  
澄江波澹澹  
霽日花濛濛  
陰澗長瑤草  
陽崖明藥叢  
樓臺霄漢上  
雞犬雲蘿中  
杳靄逢羽人  
秀眉顏貌紅  
授我寶丹訣  
相期躡仙踪  
覺來玉堂



迥彷彿聞疎鐘披圖起遐想逸趣諧心胸丹梯如可攀  
共汝巢雲松

送陳從器歸長樂

置酒新亭上親賓儼成行蘭肴雜肥鮮綺席羅瓊漿顧  
茲繾綣情樂飲各盡觴中筵忽不懌援琴撫清商絲桐  
易為感離思擾中腸念子連枝別荏苒逾十霜豈不眷  
友愛嘉會安可常驪歌首前途僕御促行裝故鄉渺何  
許路繞川原長翹首閩山雲惻然五內傷願為晨風翼

送子東南翔

送熊給事尊甫歸江右

祖席白下亭買櫂秦淮浦人分梧葉秋恨帶芭蕉雨長  
風吹片帆倏忽邈何許矯首隔雲山望望空延佇

林伯璟湖山書室

結廬依湖山而無塵迹侵端居事佔伴侶水木澹冲襟鉤  
簾挹空翠白雲迷遠林地偏見馴鹿樹密聞幽禽牙籤  
清晝永燈火閒堂深微風動虛幌明月生素琴悟茲靜

中趣契彼塵外心矧茲游龍門行當膺華簪別來故園  
夢夜夜湖山岑

題胡宗器山水

丹壑凌翠微上與仙源通垂蘿翳雲日湛露滋藥叢結  
宇臨迴溪清暉隱房櫺永日對紋楸無乃柯山翁披圖  
起遐想逸思諧心胸

陳景茂榕山書室

結宇依榕峰垂帷謝紛擾嵐翠落堦除書聲度林杪橫

琴碧嶂秋草聖墨池曉期當謝清暉振翮青雲表

應召之金陵晚過彭城

揚舲上金臺日暮過彭城川原曠何許雉堞何崢嶸英  
雄久寂寞山水空含情憑高欲訪古乘月且宵征

山水小景為銓曹周宋武作二首

散帙落空翠鉤簾見嵐嶺石徑翳苔花天窗逗雲影孤  
琴如有期興入煙蘿頂

花溪過殘雨青嶂多白雲林亭透水木清暉長在君惟

應采真者相期投鶴羣

題林士悅所藏張師夔為古木上人畫

川岳蘊奇秀紺宇依白雲寥寥靈境靜佳氣恒氤氲垂  
蘿翳古木石磴滋苔紋真僧此巖棲冥心離垢氛花雨  
林外落空香天上聞蹇驢者誰子無乃陶徵君相期結  
蓮社脩然鸞鶴羣披圖發遐想泚筆揚清芬

送游鍊師月窗歸九峰

九峰羽人浮丘客霞珮雲裾帝城陌相逢共喜故鄉人

況是他鄉轉相得一從鍊鼎栖碧山餐松啖栢迺童顏  
垂蘿絕磴人希到流水浮雲心自閒芝房宴坐移朝夕  
曲几焚香守玄默半榻松風入幔寒一簾蘿月當窗白  
有時振翮青雲表俯視浮生事紛擾洞裏那知歲月深  
壺中孰謂乾坤小昨承明詔覲九重羽流駢集如雲從  
玄經坐演神樂觀靈壇跪啓朝天宮聖明孝感通天地  
遂遣真仙發靈秘青鸞白鶴互呈祥甘露醴泉同獻瑞  
瑞物由來出膚衷道流咸沐渥恩濃瓊漿夜飲天厨酒

雲珮朝辭長樂鐘  
茲晨別我歸山去  
鶴氅翩翩駕仙馭  
潭水津頭若箇峯  
青童笑引雲深處  
君登仙籍隔塵寰  
我愧金門羈一官  
他年若遂歸來願  
亦欲從師問大還

送叔治歸長樂

風急斷鴻飛  
天空曉霜白  
何處獨闌情  
都門送行客  
行客歸鄉情  
最多他鄉送  
客情如何離  
筵不醉白  
下酒臨歧忍  
聽驪駒歌  
昔子寧親上  
京國年少聲  
華已籍籍  
逸足長期霄  
漢高綵衣  
且覲庭闈側  
故園一別幾  
經年尚

書丘隴孤村邊一坏黃壤生秋草百尺高梧落晚烟子  
今拜掃歸鄉曲覽別嚴君泪盈掬積雪浮空晚泊丹野  
梅村店寒投宿我家遙在海東隅堂下紅萱日漸踈到  
家兄弟如相問為道平安好寄書

送繼初歸長樂

東風吹綠秦淮柳吳姬新壓槽頭酒鳳凰臺下勸離觴  
朝唱驪駒暮分手昔君高卧滄浪灣學得劉伶能閉關  
時貴門前足不到曲肱飲水心常閒閒居自分清泉釣



誰知夢叶非熊兆忍將白髮下東山不學青年向西笑  
天路迢迢入帝京聖恩偏遂乞歸情雲霄不遯鷺鷥去  
煙水還尋鷗鳥盟茲晨別我東門路春雨孤帆不堪駐  
興入三山若箇邊太常壽谷雲深處

題張大尹春江羣魚卷

雨香雲細東風暖藻荇參差蒲葉短江頭朝日麗晴暉  
游鱗蕩漾春波滿大魚鼓鬣恣悠揚小魚作隊俱洋洋  
披圖展玩意自適豈羨莊叟遊濠梁

賦得秦淮送王紀善可貞之魯

秦淮之水流滔滔石城巉巖春漲高江花吹風動天鏡  
海鷗拂雪飛銀濤城頭車馬日來去酒幔紅橋映芳渚  
樹色遙分揚子煙潮聲近作長干雨潮落潮生自古今  
綠蕪寒雁晚沉沉片帆長送行人遠滄波不盡離情深  
君隨銅輦登彤邸東魯迢迢幾千里應教閒時肯寄聲  
日向秦淮候雙鯉

題王介軒先生白雲巢

六平山深多白雲白雲飛來長為君縈林觸石互隱見  
浮紈積翠何網緼若人結屋此山住長與閒雲共朝暮  
忽然西笑逐飛龍雲亦隨君度江去素綵輕盈上繡衣  
紛紛片片帶霜威捧日乍升霄漢上隨風還向閩山歸  
歸來巖扉宛如昨此心況與雲無著野性惟應愛鹿麋  
荷衣不到驚猿鶴道在心閒任卷舒達生委運竟何如  
亦知萬化終歸盡願駕白雲游太虛

送吳經歷澤民復職紹興

庭梧一葉飄金井露濕鳴蛩夜初冷晨鐘聲動送行人  
殘月斜明逗孤影羨子延陵賢後昆逢時吐氣揚清芬  
昂藏已見瑤臺鶴騰沓能空冀北羣黃堂贊政更奇偉  
寒露水壺清見底庭閒鳥雀下堦除幕靜芙蓉泛秋水  
三年報政謝玉京南宮奏最沐恩榮白門朋舊俱惜別  
棠陰父老遙相迎茲晨買棹秦淮路一片風帆不堪駐  
後夜相思空斷腸矯首稽山隔煙樹

送陳叔能之西安

對酒擊長劒陽關三疊聲相看惜分手欲別難為情君  
家與我同鄉縣夙昔論心非結面西窗夜雨對青燈南  
苑春風接高宴憶昨同舟共紫宸白門三見柳枝新去  
家未久頭應白在客相看情更深此行振鐸西安路千  
里雲山舊遊處日邊斗酒未成歡天際飛雲不堪駐三  
衢咫尺近鄉關莫向明時厭冷官為語吾宗老文學相  
期努力共加餐

孫主事龍津春曉

老髯午夜鳴西頂雨漲清流溢山井曉風清漾碧粼粼  
殘月斜明逗虹影香簾喚醒春茫茫矐矐義馭升扶桑  
暖霞綠霧互明滅濛濛空翠侵肌涼天池奮翼非常調  
俯視龍津一盃小玉虹滴水漏聲殘夢入爐峰春正曉

茶坡八詠為淳安許匡作

茶坡山水稱絕竒清溪一道相逶迤翠屏嵯峨擁青黛  
拳石錯落排仙棋溪心羅漢顯真像石面兒童儼相向  
靈龜仙鶴互呈祥上水橫江各殊狀南陌春深谷雨收

農人負耒晨驅牛東津渡口晚色淨夕陽水檻看垂釣  
此中勝槩多超異況有賢人更清致平泉綠野未足跨  
蘭亭輞川果何愧萬事無心酒一觴是非榮辱總相忘  
風前舉棹鷗隨艇月下鳴琴鹿近牀林泉正可諧清賞  
仙佩何期即長往承家況有阿戎賢致身已在青霄上  
白下相逢志不羈示予八詠索題詩期君且展經濟畧  
他日歸休良未遲

賦得灤河水送張淑豫進士之北京

君不見灤河之水幾萬里東流浩浩無時已朔風慘淡  
寒霜凝一夜河流十尺冰將軍欲渡馬蹄滑客子晨過  
肌欲裂光凝匣劍凍不開寒透狐裘冷如鐵躍鯉曾聞  
孝子名淳沲乍合啓中興堪供宰輔助調羹還向詩人  
懷戰兢都門出租春將半懸想灤河冰已泮交情慎勿  
逐流澌貞潔相期同歲宴

鄭大尹做琴趣堂

製錦綰銅墨政平心亦閒簷枝掛蒲鞭理人絃誦間琴



堂訟息無機慮拂軫調徽得深趣豐山氣肅霜鍾清瀟  
湘夜靜秋鴻度一曲陽春太古音千門桃李澄幽陰鳴  
鳩拂羽桑田綠馴雉朝飛麥隴深絃歌百里如鄒魯坐  
令民俗皆淳古聲樂由來與政通不獨當年稱單父

送金長史之新淦

旅邸春歸盡那堪又送君驪歌空把別盃酒惜離分征  
旆飛吳雨孤帆入楚雲金川蓮幕靜遲爾報清芬

送江司訓之開化

一經遊上國千里惜分歧別路花明綺離筵柳拂絲揚  
帆春雁盡投驛晚鴛遲想到家林日諸生候絳帷

送人尹江右

窮冬正蕭索離思又匆匆風雨孤帆別琴尊幾日同雪  
晴淮水急雲盡楚天空花縣絃歌暇題緘寄塞鴻

送人之天官

芳草正萋萋離筵惜解攜帆開江樹遠人去浦雲低驛  
路嘶征馬津亭候曉雞九重憐赤子深用慰黔黎

送人遊錢塘

錢塘古都會風物盛繁華  
綠樹人煙合青樓酒幔斜  
湖山開麗景羅綺艷晴霞  
子去登臨候還尋和靖家

雲濤海月送南翁上人歸囊山

京國長為客都門又送僧  
千峰看飛錫數樹見傳燈  
身與雲無着心將月共澄  
囊山弦誦處趺坐演三乘

雲庄種藥

美爾幽棲日嵒扉不可扳  
鳥啼清嶂靜猿卧白雲閒  
度

嶺尋芝去開田種術還願希金鼎液為我駐顏顏

叙舊

故國別來久那堪憶舊遊鶯花春接席風雨夜同舟  
明月心千里青山夢一丘相思限吳越雲樹共悠悠

查濟中東谷

千峯縈紫翠一徑入花源地僻疑盤谷山深訝陸渾  
僧歸雲外寺漁唱水邊村高士時相過陶然共一尊

題李彥長盤谷序後

李愿棲隱處寥寥隔世氛橫琴山翠落捲幔水聲聞松  
偃留玄鶴簷虛挂白雲耳孫千載下猶解躡清芬

題林教諭萬竹書庄

羨爾書庄萬竹林幽居偏得子猷心閒宵隱几秋聲落  
盛夏鉤簾雪意深雲帶幽香侵縹帙鶴翻殘粉上瑤琴  
自憐十竹軒前玉別後春風長幾尋

送鍊師歸莆田

遠承飛詔入京華又捲玄經上羽車鶴氅已沾新雨露

仙幢遙指舊煙霞連天佩影吳霜白隔水簫聲楚雁斜  
想到琳宮春尚早步虛閒繞碧桃花

寄潘伯時

三溪橋上惜分襟別後頻懸悵望心吳楚天空春雁盡  
關河人遠暮流深安仁獨賦閒居好司馬那知久病侵  
顧我朝簪猶未擲何時同醉荔花陰

寄諸弟

空堂遙夜思依依鐘鼓初殘曙扉明鏡流年雙鬢換

青山舊業幾時歸  
平蕪鴻雁看應盡  
芳草春塘夢欲飛  
為報惠連相憶否  
京華音問莫令稀

送林典史正弘歸天台

御河冰泮柳條新  
才子鳴珂覲紫宸  
淡月疎鐘雙闕曙  
暖風晴草萬家春  
南宮奏最多嘉績  
白下離尊有故人  
明到天台仍入幕  
赤城遺老候車塵

送陳秀才循歸三山

都門祖席送行車  
才子承恩出石渠  
東觀能書推逸少

文園多病見相如孤舟浙水寒潮落獨樹關門霽雪初  
明到泮林絃誦暇題封好寄岳江魚

送鄞邑主簿復職

雙闕朝天承寵渥都門祖帳惜分攜布帆孤挂隨鴻影  
驛路重經信馬蹄楓落吳江寒月白潮平淞水暮雲低  
殷勤早食琅玕去枳棘何辭且暫棲

送鄭典史復職永嘉

奏最金門雪正花又看御命出京華寒山匹馬經吳苑



春水孤帆入永嘉  
蓮幕政閒稀報事  
蒹庭吏散早休衙  
莫嗟卑秩多留滯  
好領皇仁到海涯

挽文江周處士

鵬冠瀟洒隱桑園  
高蹈由來遠世喧  
三徑落英霜後酒  
幾株喬木水邊村  
黃粱已熟盧生夢  
哀些難招楚客魂  
遙想夜臺無一恨  
阿咸名譽擅詞垣

賦得白鷺洲送楊宜之歸廬陵

潮落江心見遠洲  
數行汀鷺斷磯頭  
石城遙際孤煙沒

揚子平分二水流  
芳草綠波空悵別  
暮雲春樹更闌愁  
玉堂暫有還家興  
未許閒情狎海鷗

送朱楚善大尹之鄒

南宮奏最沐恩波  
握手都門奈別何  
吳樹曉聲霜外落  
嶧山寒色雁邊多  
西風野渡孤帆遠  
斜日津亭匹馬過  
聞道棠陰人候久  
莫將行李更蹉跎

送魏彥恩之連州

楊柳絲絲繫別情  
旗亭把酒送君行  
鶯花寥落三春暮

雲水蒼茫萬里程  
梅嶺瘴消香騎遠  
桂江風靜布帆輕  
到官如見陽山令  
為道平安蚤寄聲

送黃德光之瓊州

一麾出守赴遐陬  
何限衣冠送遠遊  
細柳新鶯娛祖席  
斷雲歸雁帶行舟  
枕柳葉暗蠻煙淨  
荔子花香瘴雨收  
邊徼從今無警候  
鯨波萬里盡安流

蘇臺古柳送黃典史歸長樂

吳苑繁華似昔年  
千株楊柳尚依然  
長臨南陌迷行客

曾逐東風拂舞筵，高樹蒼烟飛鳥外。  
亂蟬黃葉夕陽邊，  
歸期早慰崇陰候。莫把長條繫別船。

乙未元旦早朝簡林編脩尚默

時林侍奉天殿

椒盤喜迓歲華新，共整朝衫覲紫宸。  
霽雪漸消寒外牖，東風先報禁中春。  
班趨鵷列星辰近，地切鸞坡雨露均。  
共荷發生何補報，願輸丹懇答皇仁。

送王別駕之太平

傳經壁水舊馳名，作郡今看佐太平。  
殘雪亂山行客思，

離堂別酒故人情  
春回淮浦孤帆渡  
路入當塗五馬迎  
公暇題緘寄知己  
好憑歸雁到瑤京

秋江別意

西風蕭瑟白蘋洲  
江上離人賦遠遊  
落日明霞千嶂晚  
斷蟬黃葉幾家秋  
長天候雁將行色  
極浦寒潮帶別愁  
客裏披圖增感慨  
不堪吟倚水邊樓

鄭景能洪山書

翠微精舍展洪山  
曲几明窗盡日閒  
礪壑雲深嵐氣溼

石牀雨積蘚花斑  
松邊煮茗留僧話  
竹外鉤簾待鶴還  
自是長才終宦達  
未應林壑久躋攀

奉和胡學士冬至後六日游牛首山佛窟韻

紺殿迢遙石徑微  
紅塵不到市聲稀  
潭腥定水知龍逝  
松偃低枝見鶴歸  
載酒詞臣畱墨妙  
談禪老衲悟真機  
翫游自足諧清賞  
却笑淵明早拂衣

墨菊

嫩菊散輕煙  
青蓋含朝露  
不見柴桑翁  
遙情托毫素

墨竹

月白三湘秋河明上池水夜半玉簫寒青鸞忽驚起

羅寺晚鐘

稍分清籟寒復送斜陽暝煙際聲未沉僧歸在蘿徑

曲磻垂虹

淙淙風雨鳴澹澹虹霓白引領孤興遙蒼林界秋色

十八學士棋圖

唐家樓閣儼瀛洲簪佩聯翩結勝遊山水蒼蒼圖畫裏

漢陵無樹不宜秋

題張天師墨竹

道人醉墨洒淋漓金錯交橫碧玉枝好是夜深仙鶴去  
一天涼月影參差

敗荷脊令為沈志行題

蕭瑟蒲蓮野水清雙飛遙羨雪鵝鳴誰憐獨影空原上  
幾度秋風憶弟兄





石倉歷代詩選卷三百十三